

Powšitkowne WOZJEWJENJA

njedźelu, 30. nowembra 2014

Adwentny nyšpor w Njebjelčicach

Hudźbny adwentny nyšpor wotměje so tutu njedźelu, 30. nowembra, w 14 hodź. w Njebjelčanskej cyrkwi. Program wuhotuja cyrkwinski chór, šola a młodostni wosady kaž tež mały chór Budyskeho Serbskeho gymnazija. Wšitcy su wutrobnje přeprošeni.

Beneficny koncert a spěwny wječor w Jaseńcy

Na serbski beneficny spěwny wječor sobotu, 6. decembra, w Jaseńcy přeprošuje Florian Rynč zhromadnje z muskim spěwnym kwartetom „PoŠtyrjoch“. Započatk w Rynčec bróžni w Jaseńcy (čísło 8) je w 19.30 hodź. Wopytowarjo smědža so na wotměnjawy program wjeselić, mjez druhim na nowe spěwy skupiny „PoŠtyrjoch“, zdžěla samo šěsćlósne z podpěru dalšeju spěwarjow a beatbox. Tójšto pěsnjow změje na tutym wječoru premjeru. Lětuši program ma hesło „Z lubosću PoŠtyrjoch“. Wunošk z wječora nałoži so za lětušu hodownu pomocnu akciju Towarstwa Cyrila a Metoda „Łužica pomha“. Po koncerće su wšitcy na zhromadne spěwanje přeprošeni.

Přeprošenje na koncert

Šulerjo Budyskeje Serbskeje zakładneje a Serbskeje wyšeje šule wuhotuja pjatk, 5. decembra, zhromadnje ze šulerjemi z českeho Jablonca nad Nísou koncert w Michałskej cyrkwi w Budyšinje. Započatk je w 17.00 hodź.

Adwentnička młodostnych

Adwentnička serbskich młodostnych je lětsa njedźelu, 7. decembra, w Baćonju. Započatk je w 14 hodź. z nyšporom w cyrkwi, kotryž wuhotuje chór 1. serbskeje kulturneje brigady z Budyšina. Přizamknje so swačina na farje.

Kubłanske dny w Schmiedebergu

Kubłanske dny serbskich młodostnych budu wot pjatka do njedźele, 2. do 4. januara 2015, w Schmiedebergu. Přizjewjenja přijimaja so hač do štwórtka, 18. decembra, w Dekanatsnym dušepastyrstwe we Worklecach pod telefonowym číslom 03 57 96 (9 55 95) abo z mailku na don.boskowy-dom@t-online.de.

Paslenje hodownych darikow

Dekanatne dušepastyrstwo přeprošuje šulerki a šulerjow 6. do 8. lětnika sobotu, 20. decembra, wot 9 do 14 hodź. na paslenje hodownych darikow do Don Boskoweho domu we Worklecach. Zajimcy njech so prošu hač do wutory, 16. decembra, pod telefonowym číslom (03 57 96) 8 87 07 přizjewja. Za wudawki dnja zběra so na wobdźělnika přinošk we wysokosći džesać eurow.

Adwentne wiki w klósterskim wobchodže a koncert w cyrkwi

We wobchodže klóštra Marijineje Hwězdy w Pančicach-Kukowje přewjedu so sobotu, 6. decembra, wot 12.30 do 18.00 hodž. małe adwentne wiki. Džěci móža w tym času, hdyž so dorosćeni rozhladuja, paslić. Wot 16 hodž. wočakuja tam swjateho Mikławša. W klósterskej cyrkwi budže w 17.30 hodž. adwentny koncert. Tutón wuhotuje cyrkwinski komorny chór z Mišna.

Adwentny koncert Budyskich gymnaziastow

Na swój tradicionelny adwentny koncert přeprošuje chór 1. serbskeje kulturneje brigady z.t. sobotu, 13. decembra, w 17 hodž. do Michalskeje cyrkwyje w Budyšinje. Solistka budže Daniela Hazec, na piščelach zahraje Michał Donat, a Gina Hentsch přewodźuje chór na klawěrje. Cyłkowny wumělski nawod změje Friedemann Böhme.

„Wodych duše“

Za katolskich a ewangelskich wěriwych poskićuje so w předawanišćach z wuběrom serbskich knihow a w Smolerjec kniharni wudaće „Wodych duše“. Knihu z modlitwami za wšědny dzeń je Terezija Kubašec zestajała. We wjetšim pismje je kniha wosebje za staršich ludźi a špatnje widźacych myslena.